

心嚮往齋集

公朝杜齋集

心鄉往齋集卷八

曲阜孔繼鑠著

吳興劉承幹校

壬子

是年至癸丑詩爲壬癸詩錄已刻板燬於兵

漫興四首用廣楫家姪韻

湖上愁霖五夜前披衣起坐獨看天鷗鳬浩蕩浮家夢

雞犬昇平過眼煙誰使趙佗連百粵空悲賈讓上三篇

野夫出處將何補載酒從人學草玄

宵旰廟謨資重寄西南禁旅幾時回將軍坐視洮陽失

驕虜還過灌口來一夕九嶷生鼓角三年五嶺半蒿萊

堯天遐邇春風遍苦盼中原驛使梅

鄰壑號寒甚候蟲黃埃苦霧濁流中新豐故里家何在  
孝武淇園竹已空逋賦蠲除仍議賑任賢寬大但論功  
聖恩自足隆千禩羣力何由奠八鴻

萬感登臨江上臺汀洲漁笛雜懽哀摧藏越石縱橫氣  
零落虞卿箸述才雲出雲歸空度日街南街北且銜杯  
深山窮谷孤松在閒撫龍鱗百尺苔

歸舟二首

江外空明山外青汀花零落打浮萍閒吹一笛船頭坐  
多少魚龍帖耳聽

破艇饑黎泛夕曛渡江雁鷺不成羣歸人也傍蘆花宿  
舵尾炊煙接遠雲

狂歌

痛飲狂歌變楚騷軍聲江漢已旌旄綠楊城郭紅閨夢  
一夜西風萬里濤

題平山堂

蒼蒼杯酒照煙螺凭弔何心歎也歌江上歸來燕市早  
閒中離聚廣陵多文章血淚秋風雨臺榭雲波古薜蘿  
昨夜荆襄有來雁牀頭一劒起摩挲

與曹子剛

嶽嶽文章骨誰能屈建安長年貧亦飽短榻夜勝寒文  
選教兒熟醇醪足古歡江城來日別門外苦風湍

贈梅童子

忽忽朋儔樂霜風年鬢侵故人真有子今日復何心敗  
屋悲留硯空牀久覆琴朝鳴盼雛鳳東日在丹林

微湖夕泛圖爲邢子膺題

多少哀鴻不可聽晚風孤櫂下蒼冥舊時雲物都如夢  
杳靄微山數點青

與蕉隱論劒

荒荒破月照江城江外空山落木聲老屋三閒天萬里

白頭相對兩書生

灣頭小泊

臨灣坊頭古戰場江陽水郭樹蒼蒼征人各有天涯感  
誰與停橈看夕陽

揚州九日集古東隱庵題金雪舫畫卷

金谷蘭亭感逝煙等閒落帽繼前賢輸君白雪三千首  
老我黃花五十年愁對汀洲幾鴻雁夢迴鼙鼓到林泉  
壺觴今日仍佳節未許披圖各愴然

題梅花嶺

漁洋談獻閣部死事與史  
異同書之以彰其心焉

半壁東南一夕傾空城猶自閃危旌盡拋血淚投諸鎮

生致頭顱示敵營正史千秋悲約略孤忠一死極分明  
從來稗野資風紀關塞悲涼述老兵

揚州留別周弢甫

世局潛悲涕生機苦困橫魚鹽安足隱草木久疑兵山  
骨寒無色江流怒有聲不堪盈手贈明月古蕪城

白露

零露團團欲白時歸帆重泊露筋祠嶙峋海嶽千秋筆  
淒苦漁洋七字詩水退湖田登穀早夜深漁火下曾遲  
普天樂土非今日愁買村醪醉一卮

餘生

輾轉征塵底餘生甘息機病知衰有漸貧覺累翻稀野  
水寒生鬢空林月在衣一竿求樂土何處夢漁磯

追悼鄭甥

惻惻冰絃隔歲聽高山流水付空冥鄭虔未老稱三絕  
崔曙無兒賸一星柳憶官隄春漠漠草留甥館日青青  
單栖小鳥仍依我不用投懷老淚零

桃源

桃源小邑分淮郡桑竹良田異武陵千里河流浮馬足  
半川霜氣下漁簖秋深古驛寒無雁水退人家夜有燈  
搔首對天商出處臣今老矣復何能

河上晚秋

蹇驢破帽客何之河上炊煙起尙遲月沒澹於初白地  
柳寒疏似始青時久拋安石圍棋局飽讀淵明乞食詩

極目南天烽火在蒲萄一醉淚千絲

哀陶山

陶山沈先生邁淮之桃源人潛居獨學知恥能  
貧暮秋余有宿遷之役野宿河店夢君告以不

諱夕過其廬頽然長寢矣楔齒綴足百無一具此不  
足爲陶山悲余生五十年恐不復再見有陶山者能  
乎勿悲

大河日東逝之子云西遊西遊不可極言返崑崙邱昨  
夜我夢子眉宇含清秋告我怛化去歡喜無煩憂我來  
爲親故不得爲子留幻境變眞諦有淚如川流

葫蘆中有天在夢子授我授我將何爲百用無一可西  
南笳鼓急將帥動相左中原決黃河蠹蠹人其羸披衣  
起看天太白當空大引領還入房三歎對燈火

三歎夫何爲棲託隘屠釣黑白走殘枰誰者覷其妙在  
昔子規我在進虞我躁一退子眉展三載隔言笑萬古  
證同心不必在同調告子以無聲大野荒雞叫

題句生蘧廬夜話圖

歲晚霜林澹遠青故人黃葉與凋零南湖也有三間屋  
曉立閒階數大星

排悶四首

叢梅異縣又寒花候雁飄零歲序加老矣小人猶有母  
茫然大地似無家十年河上看流水百口天邊倚暮霞  
淮北荆南數千里長江一夕起悲笳

烽火驚心草木寒殊方醜虜雜相干嚴霜聲死中軍鼓  
落日旗空大將壇黔首流離棄邱隴至尊哀痛託心  
肝中天明月黃霾掩狐鼠縱橫夜未闌

紫宸馳告錫膚功在野傳聞頗異同城郭自墟甘委敵  
蠻夷不長亦稱雄湘颿潛渡魚龍泣漢水悲流日夜東  
儲餉虛無兵索莫填胸野老恨何窮

高歌欲放轉吞聲蒼狗浮雲百變更駿骨久虛燕國士

儒冠真媿魯諸生  
斧柯寂寞青山老  
鏡影低迷素髮橫  
太白幾時芒角小  
未應四海厭昇平

續排悶

巴陵鶴唳下空煙  
旌旆愁懸鄂渚前  
移節側聞新代將  
徵兵久罷古屯田  
窮陬山驛誰籌筆  
遠戍江天盡控弦  
楚雨冥冥連嶠嶠  
荒雞破夢已三年

莫更驚濤走鵲鵝  
供輸軍國苦撝羅  
河渠移徙工誰代  
鹽鐵紛更論枉多  
漢室農功陳貴賤  
周官財路理平頗  
安危民命基宸斷  
損益均平補太和

南天鼙鼓夜悲涼  
短劍深杯枉自傷  
安在賢豪困資格

從來戎馬失倉皇  
書沈霜雁懷衡麓  
夢穩江魚祝武昌  
風笛數聲愁入耳  
可能天外有滄浪

城南南斗暗前津  
湖岸冰澌捲斷蘋  
早分管甯長阜帽  
那容朱雋緩黃巾  
深林歲晚虛垂淚  
小縣秋成未療貧  
犬馬催年過五十  
回頭眞是太平民

寄懷牧庵馬陵

八寶亭邊雲不開  
射陽湖上雨初來  
誰家深院有風笛  
隔歲黃河同酒杯  
冷眼悲看天下事  
危時幾見古人才  
專壇側席今逾急  
未許狂歌戀草萊

寄樹齋侍郎都下

全楚氛埃逼長安雨雪霏山城方轉戰江路尙能歸一  
疏完丹悃餘生有翠微千秋明出處何恨寸心違  
餘事論風雅名還冠列卿衰顏豪命酒老淚苦談兵戰  
伐看天意窮愁戀帝京太行秋色好搔首暮雲平  
寒夜示阿楫四首

歲暮吾何有窮居悔吝多飄風吹白日凍雨落寒河水  
國宵聞雁江天人荷戈艱難老母共來日奈愁何

望遠兄歸晚湖城夕照寒烽煙洞庭樹冰雪武陵灘客  
久饑貧在官卑去住難阿咸勞陟謁淚眼日漫漫

兀兀醒還醉憂端不可裁草萊空有淚帷幄豈無才突

虜三湘破移師百粵來  
九重方減膳圖像待雲臺  
離聚雜懽戚生涯總不禁  
一燈閒共影百歲若爲心情  
話且長夜家書果萬金  
霜颺滿天地莫更鬢毛侵

再示阿楫四首

鞞鐸津頭路柴荆湖上家有親  
依歲晚汝父尙天涯樹  
老鷗空宿雲陰雪欲花  
愁懷齊少長同是感年華

強懷寬汝輩言笑亦徒然  
文字非今日兵戈送暮年  
寒深風落木城小月橫天  
惆悵西園笛羈孤客未眠

小捷傳俘馘雄師控上流  
天威方震赫戰士莫淹留  
已是墟江夏翻虞徑蔡州  
將軍洞形勢旌旆勿深愁

世路嗟余拙兒曹覺汝才遙天看翼軫何地有蓬萊黃  
道春將轉青年歌莫哀毋爲學樗朽林壑負栽培

壬子歲暮謁先大夫墓述哀八首

春月奉靈輅幽隧封千秋瞻掃孤兒來一歲倏已周人  
生有大夢金石同荒邱杖履不天假百歲先茲遊四覽  
復何有雲族空夷猶嚴霜變厚土野水流寒溝日夕北  
風動林樾何翛翛

墓祭禮非古哀至亦人情坡壟閒體魄疇不愴所生在  
昔買兆域半畝無餘耕舊塋故鄉遠徧處難移更大河  
枕北陸洪澤南天橫水氣逼楸檟荒隰多榛荆野鳥爾